



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè discutienda in Scholis Medicorum, die Mercurii decimo-sexto
mensis Junii, anno Domini M. DCC. LI.*

M. LAURENTIO FERRET, Doctore
Medico, Præsede.

An Clivi Mendonici situs, ut amœnus, sic salubris?

I.



BEATUS ille, qui procul urbis fumo ac strepitu, dulcem captat
ruris auram omni solutus negotio; sibi vivens & amicis numerat
sine nube soles. Vides ut surgens sopitas aperiat palpebras roseis
aurora digitis, ut variis, quos terræ fructibus appingit, oculi re-
creentur coloribus, ut miro avium concentu aures demulcean-
tur. Esurienti dulcius sapit esca, jovis aurâ spontaneam obso-
nante famem. Agrestia nunc, nunc culta percurrit indefessus; naribus blandè

A

favet zephrus pennâ jocanti mulcens odoratos flores; indè diurnas emensus horas, placidæ dat membra nocti. O nimium fortunatus, si sua bona norit! Nec tamen rusticationem sua semper merces sequitur; non enim omne rus omnia fert commoda. Terra obnoxia cœlo est. Sæpè plura nitent humi, ubi cœlo plura sordent. Fallit aliquandò soli facies, & primâ fronte salubria incautos decipiunt. Floribus amœnis & pulchrâ fronde subridens arbor vacuum non rarò delusit colonum. Tibi dulce est valere in loco? Situm observa: montium ac vallium dispares fortunæ. Non ubivis circumfluit purus aer, molliter spirant venti, salubris unda manat. Non benigno quemque locum Sol salutat aspectu. Ut à situ dulcedo loci, sic salubritas.

I I.

SUNT quos super ardua montis culmina penates instituisse juvat, æquilarum more suspensos; latè prospiciunt ii, hinc fortunati sibi plaudunt. Humiles habitare plagas amant alii, solos sanos viventes clamant in valle. Hunc, si juvat umbra & nemorum recessus; illum, si apricum amat campum patiens pulveris atque solis; gaudentem in fluminis ripâ hospitari; quibusvis rationibus nunquam dimoveas. Oppidi laudat quisque rura sui. Sapiunt omnium maxime, qui salubre dulci miscet. Tellus depressior, imâ latens convalle, stagnantibus obruitur aquis, aëre libero ac perflato orbat: aut horret tempestatibus, aut ventis datur ludibrium montis cacumine statio editior. Curvo sub colle degentem coquit acrior solis æstus. Vapores humidos mittunt sylvæ & frigus opacum: fibras relaxat & inducit humoribus putredinem unda multa circumfluens, aut proximior amnis. Vicinas præsertim fuge paludes, quæ virus eructant & morbos. Nec ventorum sperne rationem; divisum imperium cum elementis habent, sanitatis fortunas & fata secum vehunt; quorum ortus respice studiosus. Corpus hebetat & solvit plumbeus auster; aquilo firmat & excitat. Affert ille maturam senectutem, longam hic alit adolescentiam. Lethali humidus frigore altius penetrat ab Occidente ventus, ab Oriente tepens & siccus poros referat. Ergo locum capies qui sic subsideat in valle, ut aëra laxum excipiat, vel sic confurgat in collem, ut sole nec æstuet, nec ventis rigeat. Orienti expositus, clemens experiatur cœlum, mollesque auras frequentius quàm ventos habeat. Sed & aquas observa: ut cœli, sic soli salubris dant indicia. Seu scaturiat è fonte lympa, magno seu flumine volvatur, levis & limpida stomacho gratior bibitur & salubrior. Nec verò tantum fluentes aquæ, sed & sponte nascentes herbæ soli indolem eloquantur. Ex levi enim teneroque solo plantularum sylva pullulans odoros siccantesque spargit vapores, cerebro pulmonique perutiles. His gaudenti commodis, si detur simul longos prospicere agros, hujus & mens recreatur, & corpus servatur incolume. Ubi igitur tot & tanta consociata inveneris commoda, ibi securus pone larem.

I I I.

AD Occidentalem Lutetiæ partem, mediâ inter hanc & Versaliarum urbem viâ, secundum Meridionalem sequanæ ripam, collis assurgit; qui regionem prætexens viam, ab Occidente desinit in juga Sevana, & versus meridiem Meudoni lateri accumbit. Jucundo hujus clivo locus inest, cui ut decus, sic & nomen, elegantiam suâ facile princeps aspectus asseruit. Hic stet contemplator, & avidis oculis mirabili spectaculo inhians, velut è speculâ rura circumpatientia prospiciat. Non per inane vagatur oculus, locorum tantum exspatiatus deserta, hæc plena tædii; non ex alto præ-

ceps cadit in infima nimis, attonitum reddunt caput hæc potius quam reficiunt; non distanti nimis limite remota aspectat, quæ fatigant mentem nondum recreent. Rident omnia oculis, & animos oblectant; undique rerum ordo, copia, apparatus. Uno aspectu metiris horizontem, quem pictoribus vix tantum fingere fas sit, quantum efficere naturæ fuit promptum; oculi nullibi blandius acquiescunt. Delicias ruris maritatas artis opibus cerneres, adeò jucundus est, adeò dives vastus ille amœnitatis campus! Sed quid spectatorem moror? Aërias ab Oriente Urbis turres & populosa suburbia, ab Occidente, nemorosos Sanclovii colles atque palatia miratur. Miratur & sequanam qui, ubi vectigales Parisinis nymphis undas devexerit, fugit ab urbe. Multum salutat littus fluens amnis, alius semper & idem. Nunc medicatis collis Passiaci fontibus allabitur, nunc aspicit illud Martis monumentum, ubi honesto truncati vulnere, veterani bellatores sanguine emptâ quiete fruuntur; mox aspiciet surgentem à fundamentis, jubente Marte altero, æmulam domum, ubi delecta juvenus, militiæ rudimentis informata, discet petere pulchram, per ignes, per vulnèra, mortem. Indè profluens, quasi captus amœnitate loci, curvo tramite laudati collis oras alluit. Insulas circum suspensis ludit aquis, nec, nisi post dulces moras, ad Sanclovium properat. Quid plura? Obsequiosum videre est amnem, obversatam planitiem semilunari circuitu ambire. In quâ, quis numeret tot prædia? Quis tot elegantes villas? Hic frequentatum Bononienſe nemus, eique adjacentes vicos aspice, nostrates illic elysios campos & antiqua regum tecta, lætissima ubique prata, luxuriem segetum, bacchi munera lustras oculis. continuis non sine nomine montium jugis, ad Amphitheatri normam dispositis, vasta circumscribuntur hæc loca. Talia prospicit locus ille, utrinque pampineis comitatus collibus, plurimâque à tergo sylvâ coronatus. O faustum clivum, inhospitam nuper atque haud tritam tellurem! Sorte dignus eras aliâ: apta ponendæ domo reperta es area; ipse te, *Belvisus*, sequana, ipsi te colles, ipsa hæc nemora vocabant. Nec operosæ arti tuum debes nec impensis decus. Quid enim optanti dives deneget solum? Viscera aperias? saxosa sunt. circum circâ fodias? calcem, gypsum, arenam, invenire est; egregii fundamenta laboris. Nec deest nuntia lymphæ glarea; undique scaturiunt rivi. Diceres ad hoc opus gaudentem versari terram, artificum vota superasse. Hinc cœlo novum se prodit ædificium. Sed ut opificis labor, sic laus, ista sint. Quod Medicorum est tractant Medici. Quæ grata sæpè sunt sana; sed quæ sana, grata magis.

I V.

JA M quàm multa ferat salubria faustus ille situs, audi. Ad Septentrionem leviter declinans, Solique nascenti obversatus, primis ejus radiis collustratur; unde, roscido fursùm elevato humore, purgatus aër, pulmone purissimus trahitur. Spirantibus & ab ortu & à Septentrione ventis perflatur, juvandæ cutis exhalationi per quam idoneis. Medio collis clivo recumbentis loci siccam temperiem laudes. Ut veniens dextrum latus aspicit Sol, sic discedens curru fugiente lævum vaporat. Nec ea est vicinia montium aut proceritas, quæ, Solis geminans incendia, collem faciat æstuosum: libero patienti aere fruitur; nullo, orientem versis, montium objectu venti disturbati, planitiei facilè ac liberè incumbentes, per campos felicissimè collem versùs excurrunt. Hinc quàm purus aër, quàm abstersus, sequanæ, quibus videtur ferri, refrigeratus undis; ad collem primâ potissimùm luce ap-

pellit, & incolas recreat. Hæc venti præstant; hæc sequana, qui solaribus ubique expositus radiis, stagnans nunquam, nec citior, leni & æquabili cursu properat, singulis vitæ beatioris usibus & commodis non impar. At quid ego de sequanâ? Jucundus collis felici enatas sinu lymphas excipit. Hæ gratæ palato, viscera faciliè permeant; leves stomacho, pectoris amicæ, sitim fugant suaviter & explent, appetitum promovent & excitant. Non illæ vel levissimam vasis crustam obducunt, non lentè excoquunt legumen, faciles subjecto igne penetrari, faciles nativum frigus resumere. Undis adeò salubribus irrigatum salubre pronuntiare solum, quis dubitet? Quod ni credis, solum explora. Diversis habitatum reperies plantarum familiis, quæ suaves inter se miscent odores, cerebro nervisque gratissimos. His inspiratis, pulmonis fibræ lenitè titillatæ roborantur; sanguini, quovis cardiaco certior, vis additur, succoque digestivo virtus imprimitur, omni pharmaco longè salubrior. Quod tandem certius salubritatis indicium quàm gaudentes solo vites? Bacchus amat colles, Bacchus aëris puritatem, & telluris salutiferam indolem nuntiat.

V.

EX E G I quæ celebrandi sitûs erant. Hic mentem exhilarant oculorum illecebræ; cum aëre spiratur, hauritur cum lymphâ sanitas. Nimiùm ne crede sensibus; inquiet aliquis: loci captus dulcedine situm salubrem citiùs exclamas. Ventos undique depræliantes, humidos vicini amnis halitus, torrentem totâ die solis æstum, tu inter sanitatis commoda reposueris? Quî vi-geat inter hæc functionum integritas? undique bellum & insidiæ; nullo non die, nullâ non horâ mutatur loci temperies; vana meticulosi verba! clivi recordare situm; Meudonici montis rectus culmine, Villadavræique & Sanclovi collibus defensus, quid à meridie pertimescat? Quid ab occidente? Hinc atque indè convallatur locus; Eurique & Boreæ alternis vicibus expositus, nec præcipitem Africum decertantem Aquilonibus, nec rabiem timet. Noti: at urges; rapidi saltem Aquilonis insultus perferendi; hinc tusses, faucium asperitas, alvi restrictio, suppressio urinæ, frigora, horrores, dolores lateris & pectoris. Hæc satis, ô querule; Aquilonis vim lenis Eurus temperat, mulcetque radiis sol beneficus. Sed quid boream criminaris? siccus ille detergit aëra, frigidoque spiramine mitigat solis ignes. Nec purum amnem incusâ, ferentemque dona ne timeas sequanam; ut haustu salubrior nullus, sic vapore nullus magis innocuus. Quid plura? Potiorem nosti-ne locum? Est ubi plus tepeant hyemes? Ubi Syrii æstum leniat aura gratior? Præsertim vere cùm tempestas arridet, floribusque conspergit anni tempus herbas viridantes; dulce ridentem clivum laudabo, dulce spirantem,

Ergò Clivi Meudonici situs, ut amœnus, sic salubris.

Proponebat Parisiis, SIMON - ANTONIUS BRINGAUD;
Pontælianus, Rothomagensis, Saluberrimæ Facultatis Medicinæ Parisiensis
Baccalaureus, A. R. S. H. 1751, A SEXTA AD MERIDIEM.